


道行般若波羅蜜經

才四

六十九  
鱗四

47466



元祿九年丙子二月日重脩

皇圖聖圖 帝階銀昌

佛日增輝 佛容輪常轉

山城州天安寺法金剛院置



道行般若波羅蜜經卷第四

鱗

後漢月支三藏支婁迦識譯

嘆品第七

佛言彌勒菩薩摩訶薩作阿耨多羅三耶三  
菩阿惟三佛時亦當於是處說般若波羅蜜  
須菩提白佛言云何彌勒菩薩摩訶薩於是  
處說般若波羅蜜佛語須菩提彌勒菩薩摩  
訶薩於是成阿惟三佛時不受色說般若波  
羅蜜不空色說般若波羅蜜不受痛癢思想  
生死識說般若波羅蜜亦不空識說般若波  
羅蜜亦不脫色說般若波羅蜜亦不縛色說  
般若波羅蜜亦不脫痛癢思想生死識說般

若波羅蜜亦不縛識說般若波羅蜜須菩提  
 白佛言般若波羅蜜甚清淨天中天佛言色  
 亦清淨須菩提言故般若波羅蜜清淨佛言  
 痛癢思想生死識亦清淨須菩提言故般若  
 波羅蜜清淨佛言如是空之清淨須菩提言  
 故般若波羅蜜清淨佛言色清淨無瑕穢般  
 若波羅蜜亦如是痛癢思想生死識清淨無  
 瑕穢般若波羅蜜亦如是佛言如空無瑕穢  
 故般若波羅蜜亦清淨須菩提白佛言其受  
 學誦般若波羅蜜者終不橫死若干百天若  
 千千天常隨侍之若善男子善女人為法師  
 者月八日十四日十五日說法時得功德不

可復計佛言如是如是須菩提得其功德不可復計若守般若波羅蜜者其功德出是上去何以故須菩提般若波羅蜜者即是珍寶故於法無有作者亦無有得法者亦無有持者何以故法甚深故亦不可見亦不可得亦無有得者須菩提亦不見般若波羅蜜何以故須菩提亦不可名亦無有見得般若波羅蜜者所索不可得亦不見般若波羅蜜甚深如是亦無有生處般若波羅蜜無所行亦無所不行般若波羅蜜亦無有持法者亦無有守法者如空無所取無所收無所見亦不無觀亦不無見三千大千刹土諸天子飛在上

俱皆觀便舉聲共嘆曰於閻浮利地上再見  
法輪轉佛謂須菩提無兩法輪為轉亦不想  
有一法輪轉不轉是者即般若波羅蜜須菩  
提言如是天中天極安隱摩訶波羅蜜是於  
菩薩摩訶薩無所罣礙法阿耨多羅三耶三  
菩阿惟三佛是無有法成阿惟三佛者何所  
法輪惟三佛見法為轉無所還法為轉亦無  
法有恐者無有法而憂者何以故若有兩法  
為不可得何所法憂亦無法轉者故諸法如  
空無所轉亦無法有還者乃至諸法亦為無  
所有佛語須菩提空者無所轉亦無轉還亦  
無想亦無願亦無生死亦無所從生亦不有

轉亦不轉還作是說者是爲說法無所說者  
亦無所得亦無有證作是說法亦不般泥洹  
作是說法亦無有盡須菩提白佛言無極波  
羅蜜如空無有極天中天一等波羅蜜者於  
諸法悉平等天中天二恍惚波羅蜜者爲本  
空天中天三無上波羅蜜於諸法無所著天  
中天四無人波羅蜜無有身天中天五無所  
去波羅蜜無所至天中天六無所有波羅蜜  
無所持天中天七無有盡波羅蜜無有極天  
中天八無所從生波羅蜜無所滅天中天九  
無作波羅蜜無有造者天中天十不知波羅  
蜜無所得天中天十一無所至波羅蜜無所到

天中天<sup>二十</sup>無垢波羅蜜用淨故天中天<sup>三十</sup>無

著波羅蜜無所得天中天<sup>四十</sup>夢波羅蜜無有

我天中天<sup>五十</sup>清淨波羅蜜無瑕穢天中天<sup>六十</sup>

不可見波羅蜜無有處天中天<sup>七十</sup>定波羅蜜

不動搖天中天<sup>八十</sup>無念波羅蜜悉平等天中

天<sup>九十</sup>不動搖波羅蜜法不移天中天<sup>十二</sup>無欲

波羅蜜本無故天中天<sup>二十</sup>無所生波羅蜜無

所向天中天<sup>二十</sup>寂波羅蜜無有想天中天<sup>三十</sup>

無恚波羅蜜無有恨天中天<sup>四十</sup>無人波羅蜜

本無故天中天<sup>五十</sup>不觀波羅蜜法無所從

起天中天<sup>六十</sup>不至邊波羅蜜無所止天中

天<sup>七十</sup>不腐波羅蜜無有敗天中天<sup>八十</sup>無不



入波羅蜜諸羅漢辟支佛所不及天中天二十九

不亂波羅蜜無有誤天中天十三不可量波羅

蜜無有小法天中天一三十無形波羅蜜於諸

法無所罣礙天中天二十不可得波羅蜜無

所生天中天三十無常波羅蜜不有壞天中

天四三十無苦波羅蜜諸法不相侵天中天五三十

無我波羅蜜於諸法無所求天中天六三十空

波羅蜜於諸法不可得天中天七三十無有想

波羅蜜於諸法無所出天中天八三十力波羅蜜

於諸法為有勝天中天九三十不可計佛法波羅

蜜於諸法出計去天中天十四十自然波羅蜜般

若波羅蜜是天中天十一四十於諸法亦無自然故

道行般若波羅蜜經持品第八

釋提桓因作是念其聞般若波羅蜜者皆過去佛時人何況學持諷誦學持諷誦已如教住者是人前世供養若干佛已今復聞深般若波羅蜜學持諷誦如教住其人從過去佛時問事已是善男子善女人爲更見過去三

耶三佛從聞深般若波羅蜜以不疑不恐不難不畏舍利弗白佛言善菩薩摩訶薩信受深般若波羅蜜者當視之如阿惟越致何以故天中天般若波羅蜜甚深本用精進信般若波羅蜜故設有輕般若波羅蜜其人前世時亦輕般若波羅蜜已所以者何用不信樂深

般若波羅蜜爲不問佛及弟子之所致以是  
故當知之釋提桓因語尊者舍利弗般若波  
羅蜜者爲甚深難及其有說深般若波羅蜜  
若不信者其人爲未行菩薩道反持作難自  
歸般若波羅蜜者爲自歸薩芸若慧已舍利  
弗語釋提桓因如是如是拘翼歸薩芸若慧  
者以爲自歸般若波羅蜜何以故從是中出  
怛薩阿竭阿羅訶三耶三佛薩芸若薩芸若  
慧者是般若波羅蜜之所照明於般若波羅  
蜜中住者無不解慧釋提桓因白佛言菩薩  
摩訶薩薩芸若云何行般若波羅蜜去何於般  
若波羅蜜中住云何解般若波羅蜜中慧佛

言善哉善哉拘翼乃作是問今發汝者皆佛  
威神之所致若菩薩摩訶薩行般若波羅蜜  
者不住色中如色不住者是即為行於痛癢  
思想生死識中不住如是識不住者是即為  
行於色中不究竟如色不究竟者亦故不於  
色中住痛癢思想生死識不究竟如識不究  
竟者亦故不於識中住舍利弗白佛言般若  
波羅蜜者甚深天中天般若波羅蜜者難  
得見邊幅天中天佛語舍利弗色亦甚深不  
住如色甚深不住如是色甚深不住者是即  
為解痛癢思想生死識甚深不住如識甚深  
不住如是識甚深不住者是即為解色亦甚

深不隨如是色甚深者不隨如是色甚深不住  
如色甚深不住如是色甚深不住是爲色甚深  
不隨痛癢思想生死識甚深不隨如是識甚深  
不隨如是識甚深不住如是識甚深不住是爲  
識甚深不隨舍利弗白佛言般若波羅蜜甚深  
天中天當於阿惟越致菩薩前說之聞是慧法  
不疑亦不厭之釋提桓因問舍利弗菩薩摩訶  
薩未受決者於前說之將有何等異舍利弗  
言是菩薩求佛已來大久遠爲已受決若未  
受決聞之便於中受決亦復不久若見一佛  
若見兩佛便受決作阿耨多羅三耶三菩菩  
薩摩訶薩未受決者聞是恐畏即捨還去佛

語舍利弗如是如是菩薩摩訶薩求佛道以  
來大久遠若受決未受決者聞深般若波羅  
蜜舍利弗白佛言我亦樂喜聞是語天中天  
樂人今得安隱佛語舍利弗若樂者於我前  
說之舍利弗言譬若星是菩薩摩訶薩天中天  
自見於夢中坐佛坐知今近阿耨多羅三耶  
三菩成至阿惟三佛如是天中天菩薩摩訶  
薩得聞深般若波羅蜜者是菩薩摩訶薩學  
已來大久遠今受決不復久其功德欲成滿  
菩薩摩訶薩當作是知其得深般若波羅蜜  
者其功德欲成滿佛言善哉善哉舍利弗乃  
樂作是說皆佛威神之所致舍利弗白佛言

譬言如男子行萬里天中天若數萬里者到大  
空澤中是人遙想見牧牛者若牧羊者若見  
界若見廬舍若見藜樹作是想念如見郡如  
見縣如見聚落若欲見聞作是想稍稍前行  
且欲近之不復畏盜賊菩薩摩訶薩得深般  
若波羅蜜者亦如是天中天今受決不復久亦

不畏當墮阿羅漢辟支佛道地何以故上頭  
有想以聞見得深般若波羅蜜譬若男子欲  
見大海天中天便行之大海若見樹有樹想  
若見山有山想當知大海尚遠稍稍前行不見  
樹亦無樹想不見山亦無山想心亦念知大  
海且至亦不久於中道無復有樹亦無樹想

無復山亦無山想是男子尚未見大海是應  
且欲爲至是菩薩摩訶薩當作是知天中天  
若聞得深般若波羅蜜雖不見佛從受決者  
是爲今作佛不久若聞得深般若波羅蜜者  
譬若如春時樹天中天其葉稍稍欲生如是  
不久當有華實何以故是樹本之相應知不  
久當有葉若華實閻浮利人者皆大歡喜曾  
見是樹想知不久葉華實當成熟如是天中  
天菩薩摩訶薩得見深般若波羅蜜者其功  
德欲成滿今於般若波羅蜜中自致成就是  
菩薩摩訶薩當知之過去世時學般若波羅  
蜜其功德欲成滿之所致以是故復得聞深



般若波羅蜜天上諸天無不代喜者想見過  
去菩薩摩訶薩受決時知是菩薩摩訶薩今  
復受決不久作阿耨多羅三耶三菩譬若如  
婦人有軀天中天稍稍腹大身重不如本故  
所作不便飲食欲少行步不能稍稍有痛語  
言濡遲卧起不安其痛欲轉當知是婦人今  
產不久菩薩摩訶薩亦如是天中天其功德  
欲成滿若得聞見深般若波羅蜜其念行者  
當知是菩薩摩訶薩今受決不久得作阿耨  
多羅三耶三菩佛言善哉善哉舍利弗若所  
說者悉佛威神之所致須菩提白佛言難及  
也天中天怛薩阿竭阿羅呵三耶三佛悉豫

了了署菩薩摩訶薩佛語須菩提菩薩摩訶  
薩晝夜念世間悉使得安隱傷念天上天下  
以是故自致阿耨多羅三耶三菩成作佛時  
悉爲說法須菩提白佛言如是菩薩摩訶薩  
天中天行般若波羅蜜者當云何行得成就  
佛語須菩提菩薩摩訶薩行般若波羅蜜者  
不觀色過爲行般若波羅蜜不觀痛癢思想  
生死識過爲行般若波羅蜜不觀色無過爲  
行般若波羅蜜不觀痛癢思想生死識無過  
爲行般若波羅蜜不見是法爲行般若波羅  
蜜亦不見非法爲行般若波羅蜜須菩提白  
佛言天中天所說不可計佛語須菩提色亦

不可計痛癢思想生死識亦不可計不知色  
者是為行般若波羅蜜不知痛癢思想生死  
識者是為行般若波羅蜜須菩提白佛言誰  
當信是者天中天是為菩薩摩訶薩行佛謂  
須菩提何所為行正使菩薩摩訶薩行者為  
得字耳是菩薩摩訶薩行般若波羅蜜者於  
力無所近於四事無所畏亦無所近於佛法  
亦無所近於薩芸若亦無所近何以故力者  
不可計四事無所畏亦不可計佛法亦不可  
計薩芸若亦不可計色亦不可計痛癢思想  
生死識亦不可計諸法亦不可計心亦不可  
計正使菩薩摩訶薩作是行者為無所行是

爲行般若波羅蜜正使作是行者爲得字耳  
須菩提白佛言般若波羅蜜者甚深珍寶中  
王天中天般若波羅蜜者大將中王天中天  
般若波羅蜜與空共闢無能勝者天中天從  
是中不得斷佛言如是如是須菩提欲疾書  
是經者至一歲乃竟何以故是善男子於珍  
寶中多有起因緣至使中斷須菩提言於般  
若波羅蜜中弊魔常使欲斷佛語須菩提正  
使弊魔欲斷是經者曾不能得勝菩薩摩訶  
薩舍利弗問佛言持誰威神恩弊魔不能中  
道斷之佛告舍利弗皆佛威神及十方阿僧  
祇刹土現在諸佛復假威神之恩諸佛悉共

念之悉共授之悉共護之菩薩摩訶薩已爲  
得護佛所授者舍利弗弊魔不能得中道斷  
之何以故十方阿僧祇刹土現在諸佛皆共  
護般若波羅蜜若有念說誦者若有學受書  
者皆是諸佛威神之所致舍利弗白佛言菩  
薩摩訶薩若有念誦者若持學書者以爲諸  
佛威神之所擁護佛語舍利弗皆是諸佛威  
神恩是菩薩摩訶薩學般若波羅蜜者當知  
之爲佛所護舍利弗言若有學持誦般若波  
羅蜜者佛以眼悉視之佛語舍利弗怛薩阿  
竭以佛眼視學持誦般若波羅蜜者最後若  
書持經卷者當知是輩悉爲怛薩阿竭眼所

見已佛語舍利弗菩薩至德之人學受持是  
經者是菩薩摩訶薩今近佛坐為阿耨多羅  
三耶三菩最後若有書持是經者是輩人極  
尊得大功德如是舍利弗怛薩阿竭去後是  
般若波羅蜜當在南天竺其有學已從南天  
竺當轉至西天竺其有學已當從西天竺轉  
至到北天竺其有學者當學之佛語舍利弗  
却後經法且欲斷絕時我悉知持般若波羅  
蜜者若最後有書者佛悉豫見其人稱譽說  
之舍利弗問佛最後世時是般若波羅蜜當  
到北天竺那佛言當到北天竺其在彼者當  
聞般若波羅蜜復行問之當知是菩薩摩訶

薩作行已來大久遠以故復受般若波羅蜜  
舍利弗言比天竺當有幾所菩薩摩訶薩學  
般若波羅蜜者佛語舍利弗比天竺亦甚多  
菩薩摩訶薩少有學般若波羅蜜者若有說  
者聞之不恐不難不畏是人前世時問怛薩  
阿竭阿羅呵三耶三佛以是菩薩至德之人  
持淨戒完具欲為一切人作本多所度脫是  
輩人索佛道者我知是善男子善女人今近  
薩芸若作是學者在所生處常學是法續行  
阿耨多羅三耶三菩是善男子善女人為極  
尊貴魔終無耶何不能動還令捨阿耨多羅  
三耶三菩是善男子善女人聞是波羅蜜者

以得極尊勸樂摩訶衍功德逮近阿耨多羅  
三耶三菩是善男子善女人雖不見我後世  
得深般若波羅蜜者爲已面見佛說是語無  
異是爲菩薩行當所施行其有若干百人若  
千千人索阿耨多羅三耶三菩者當共教之  
當共勸樂之當爲說法皆令歡喜學佛道佛  
語舍利弗我勸助是善男子善女人至德學  
菩薩道有作是教者心心展轉相明是善男  
子善女人有代勸助者是輩欲行菩薩道者  
若干百人若干千人索阿耨多羅三耶三  
菩者當共教之當共勸樂之當令歡喜學佛  
道是輩善男子善女人心中踊躍歡喜者願



生他方佛刹以生異方者便面見佛說法復  
聞波羅蜜皆悉了了知之復於彼刹教若干  
千人皆行佛道舍利弗白佛言難及也天中  
天以過去當來今現在法無所不了悉知當  
來菩薩摩訶薩行今是輩不懈精進學入六  
波羅蜜中佛言是善男子善女人有行是法  
者所求者必得若所不求會復自得是善男  
子善女人本願之所致不離是法雖不有所  
索者自得六波羅蜜舍利弗問佛從是波羅  
蜜中可出經卷耶佛語舍利弗是善男子善  
女人深入般若波羅蜜者於是中自解出一  
一深法以爲經卷何以故舍利弗其有如阿

稱多羅三耶三菩教者便能教一切人勸助  
之爲說法皆令歡喜學佛道是善男子善女  
人自復學是法用是故所生處轉得六波羅蜜  
道行般若波羅蜜經覺魔品第九

須菩提問佛言善男子善女人於學中當有  
効驗天中天當何以覺其難佛語須菩提心  
不樂喜者當覺知魔爲菩薩摩訶薩心卒妄  
起者覺知魔爲菩薩摩訶薩書是經時若有  
雷電畏怖當覺知魔爲菩薩摩訶薩書是經  
時展轉調戲當覺知魔爲菩薩摩訶薩書是  
經時展轉相形當覺知魔爲菩薩摩訶薩書  
是經時左右顧視當覺知魔爲菩薩摩訶薩

書是經時心邪念不一當覺知魔為菩薩摩訶薩心不在經上數從坐起當覺知魔為菩薩摩訶薩自念我未受決在般若波羅蜜中心亂便起去當覺知魔為菩薩摩訶薩自念我字不在般若波羅蜜中心不喜樂當覺知魔為菩薩摩訶薩自念我鄉里郡國縣邑不聞般若波羅蜜及所生處了不聞是其意欲悔便即捨去其人却後當復更劫數乃有所得甫當於若干劫中喜學餘經不住薩芸若棄捨深般若波羅蜜去若學餘經者為以捨本取其末有學般若波羅蜜者亦知俗法復知道法譬若狗子從大家得食不肯食之反

從作務者索食如是須菩提當來有菩薩棄  
深般若波羅蜜反索枝掖般若波羅蜜為隨  
異經術便墮聲聞辟支佛道地譬若男子得  
象觀其脚於須菩提意云何是男子為黠不  
須菩提言為不黠佛言是菩薩有德之人為  
二輩中有棄深般若波羅蜜去反修學餘經  
得阿羅漢辟支佛道於須菩提意云何是菩  
薩為黠不須菩提言為不黠佛言如是當覺  
知魔為佛語須菩提譬若男子欲見大海者  
常未見大海若見大陂池水便言是水將無  
是大海於須菩提意云何是男子為黠不須  
菩提言為不黠佛言如是菩薩有德之人棄

般若波羅蜜去反學餘經墮聲聞辟支佛道  
地於須菩提意云何是菩薩摩訶薩為黠不  
須菩提言為不黠佛言是菩薩摩訶薩當覺  
知魔為譬若絕工之師能作殿舍意欲揆作  
如日月宮殿令高無不見者於須菩提意乃  
能作不須菩提言日月宮殿甚高終不能作  
佛言於須菩提意云何是男子為黠不須菩  
提言為不黠佛言如是須菩提當來行菩薩  
道者得聞深般若波羅蜜不可意便棄捨去  
反明聲聞辟支佛法於中求薩芸若於須菩  
提意云何是菩薩為黠不須菩提言為不黠  
佛言是菩薩摩訶薩當覺知魔為譬若男子

欲見遮迦越羅者未見遮迦越羅及見小王  
想其形容被服諦熟觀之便呼言是為遮迦  
越羅於湏菩提意云何是男子為黠不湏菩  
提言為不黠佛言如是湏菩提甫當來有菩  
薩得聞深般若波羅蜜反不可意便棄去入  
聲聞法中欲求薩芸若於湏菩提意云何是  
菩薩為黠不湏菩提言為不黠佛言是菩薩  
摩訶薩當覺知魔為譬若男子大飢得百味  
之食不肯食之更食六十味之食於湏菩提  
意云何是男子為黠不湏菩提言為不黠佛  
言如是湏菩提甫當來有菩薩摩訶薩得聞  
深般若波羅蜜而不可意便棄捨去入聲聞

法中求薩芸若欲得作佛於須菩提意云何  
是菩薩摩訶薩爲黠不須菩提言爲不黠佛  
言是菩薩摩訶薩當覺知魔爲譬如男子得  
無價摩尼珠持水精比之欲令合同於須菩  
提意云何是男子爲黠不須菩提言爲不黠  
佛言如是甫當來有行菩薩道者得聞深般  
若波羅蜜反持比聲聞法於聲聞法中欲得  
薩芸若作佛於須菩提意云何是菩薩摩訶  
薩爲黠不須菩提言爲不黠佛言是菩薩摩  
訶薩當覺知魔爲復次須菩提善般若波羅  
蜜時若有財利起聞是言便棄捨去是菩薩  
摩訶薩爲自作留難須菩提聞佛如是得書

成般若波羅蜜不佛言不能得書成之是善  
男子當覺知魔為佛語須菩提若善男子多  
少書是經者其言我書般若波羅蜜於是中  
想聞其決欲有所得當覺知魔為其作想求  
者為墮魔界復次須菩提書般若波羅蜜時  
意念鄉里若念異方若念異國若念王者若  
念有賊若念兵若念鬪意念父母兄弟姊妹  
親屬復有餘念魔復益其念亂菩薩摩訶薩  
意為作留難當覺知魔為復次須菩提若有  
財利起震越衣服飯食牀卧具病瘦醫藥悉  
具足來聞菩薩耳令意亂不得學誦書成般  
若波羅蜜當覺知魔為復次須菩提有佛經



深法魔從次行亂之令菩薩摩訶薩不復樂  
欲得漚沓拘舍羅便不可意問般若波羅蜜  
佛言我廣說菩薩摩訶薩事其欲學漚沓拘  
舍羅者當從般若波羅蜜索之其不可般若  
波羅蜜便棄捨去為反於聲聞道中索漚沓  
拘舍羅於須菩提意云何是菩薩為點不須  
菩提言為不點佛言如是菩薩摩訶薩當覺  
知魔為復次須菩提若受經之人欲聞般若  
波羅蜜法師身得不安如是菩薩摩訶薩當  
覺知魔為復次須菩提法師適安欲與般若  
波羅蜜其受經者欲復轉去兩不和合亦不  
得書成般若波羅蜜如是菩薩摩訶薩當覺

知魔爲復次須菩提學經之人來欲受般若  
波羅蜜其心歡悅法師欲至他方如是兩不  
和合不得學書成般若波羅蜜如是菩薩摩  
訶薩當覺知魔爲復次須菩提法師意欲有  
所得若衣服財利受經之人亦無與心兩不  
和合不得學成般若波羅蜜如是菩薩摩訶  
薩當覺知魔爲復次須菩提受經之人無所  
愛惜在所索者不逆其意法師所有經卷而  
不肯現亦不順解其受經者便不歡樂兩不  
和合不得學書成般若波羅蜜如是菩薩摩  
訶薩當覺知魔爲復次須菩提法師適欲有  
所說其受經之人不欲聞知如是兩不和合

亦不得聞般若波羅蜜如是菩薩摩訶薩當覺  
知魔爲復次須菩提法師若身疲極卧欲不  
起不樂有所說受經之人欲得聞般若波羅  
蜜如是兩不和合不得聞般若波羅蜜如是  
菩薩摩訶薩當覺知魔爲復次須菩提若欲  
書般若波羅蜜若欲說時於衆中儻有來者  
反說誹謗用是爲學多負勤苦言泥梨禽獸  
薜荔甚大慙苦語人言當早斷生死根如是  
者菩薩摩訶薩當覺知魔爲復次須菩提若  
欲書般若波羅蜜若欲說時其有來人坐於  
衆中稱譽天上快樂五欲悉可自恣其作  
禪者可得在色天中念空者可得在無色之

天是皆無常勤苦之法不如於是索須陀洹  
道斯陀含阿那含阿羅漢道便不復與生死  
從事如是須菩提菩薩摩訶薩當覺知魔爲  
復次須菩提法師念我是尊貴有來恭敬自  
歸者我與般若波羅蜜若有不恭敬自歸者  
我不與之受經之人自歸作禮恭敬不避劇  
難法師意悔不欲與弟子經聞異國中穀貴  
語受經人言善男子知不能與我俱至彼  
間不諦自念之莫得後悔弟子聞其所言甚  
大愁毒即自念言我悉見經已不肯與我當  
奈之何如是兩不和合不得學書成般若波  
羅蜜如是須菩提菩薩摩訶薩當覺知魔爲

復次須菩提法師欲到極劇之處語受經人  
言善男子能知不其處無穀有虎狼多盜賊  
五空澤中我樂往至彼間諦自思議能隨我  
忍是勤苦不復以深好語與共語弟子悉當  
厭已心不復樂稍稍賜還如是須菩提乃作  
是礙不得學般若波羅蜜如是菩薩摩訶薩  
當覺知魔為復次須菩提法師健行乞丐多  
有方略殊不肯與弟子經反欲懈惰捨去便  
語受經人言善男子知不我當有所至則有  
所問訊如是兩不和合不得學書成般若波  
羅蜜如是菩薩摩訶薩當覺知魔為復次須  
菩提弊魔常索其方便不欲令有學誦受般

若波羅蜜者須菩提問佛弊魔何因常索其  
方便不欲令有學誦受般若波羅蜜者佛語  
須菩提弊魔王行誹謗是非波羅蜜言我有  
一一深經快不可言是故為波羅蜜如是須  
菩提弊魔王行誹謗之令新學菩薩輩心為  
狐疑便不復學誦書是經菩薩摩訶薩當覺  
知魔為復次須菩提魔事一起時令深學菩  
薩為本際作證便墮聲聞中得須陀洹道如  
是菩薩摩訶薩當覺知魔為

道行般若波羅蜜經卷第四

鱗

志

紆避

反腐

音壞也

牧

音放

廬舍

上力反

天竺

音下

竹	調戲	上	徒
越	聖王也	去	轉
羅	此王也	去	輪
薛荔	反	上	蒲
揆	作	反	下
趣	也	零	帝
乞	丐		
度	遮		迦

